

րաբաղում, ապրել ստորին հարկում, որտեղ ավելի հեշտ է շենքը տաքացնել, իսկ ամառը՝ քնել վերին հարկի պատշգամբում՝ հին սովորություն, գետնին մոտիկ վխտող մոծակներից, մեղաններից, բակում ազատ շրջող անասունի այցելությունից ազատ մնալու համար: Քնում էին դարադամի կտրանը, որտեղ և ավելի զով էր լինում: Նոր տիպի այգալիսի տները ձմեռը տաքացվում են թիթեղե վառարաններով:

Երկար, անլէրթիկ, պատերի մեջ բացած լուսամուտներով տները գերիշխում են մանավանդ Ողջի (Օխչի) և Բասուտ գետերի հովիտներում, որտեղ դարադամը վաղուց մոռացված է կամ երբեք չի եղել: Այստեղ պատշգամբները նեղ են, սենյակներն էլ նեղ, ինչպես և հորևան Մեղրու շրջանում²², որտեղ այգալիսի տները շատ վաղ ժամանակներից, դեռ այժմյան բնակիչների պատերի օրով, սկսել էին արագ տարածվել դուռ հին մեղրական ձևի տների կողքին: Դժվար է պարզել՝ արդյոք այդ երկար և անլէրթիկ տների ճարտարապետությունը մշակվել է տեղում, թե՛ մտել է գրսից: Վերջինս շատ հավանական է, քանի որ մեղրեցի, ինչպես և հարևան ագուլեցի և վանանդեցի վաճառականները, մանավանդ XVI և XVII դ. մշտական հարաբերություն էին պահպանում ռուսական և եվրոպական առևտրական և արդյունաբերական կենտրոնների հետ, երկար ապրում էին այնտեղ, ընտելանում էին այնտեղի տների մեջ բնակվելուն և վերադառնալով հայրենի գյուղերը՝ իրենց հետ այնտեղի տնային իրերի հետ բերում էին նաև ճարտարապետական նոր պահանջներ: Թե որպիսի դժվարություններ էր այդ ոճը — առաստաղը հարթ, լուսամուտները պատերի մեջ, երկար և նեղ պատշգամբը տարածվում Մեղրու շրջանից դեպի հյուսիս, երևում է այն փաստից, որ 1836 թ. Խնձորեսկում իր շենքը վերակառուցելիս Մելիք Փարմազը, արդեն ռուսական տիրապետության հաստատվելուց հետո, կանգ է առել նորից զարգամնավոր ձևի վրա և իր երկհարկանի նոր կառուցումը ծածկել է քարե թաղով, վախվխելով բաց է արել իր այդ ընդունարանում պատերի մեջ փոքրիկ լուսամուտներ և հրաժարվել է պատշգամբից: Մեղրական տիպի հին բնակարաններում մեծ ուշադրություն է գրավում բախարին, որը գեղեցիկ ձևավորված է լինում մեծ մասամբ պարսկական ոճով: Այգալիսի մի բախարի ունեցել է և Մելիք Փարմազի ընդունարանը: Նմանը պահպանվել էր և 1931 թ. երկրաշարժից կործանված մի տան մեջ Գորիսում:

Ձանգեզուրն էլ, ինչպես մեր հանրապետության այլ գավառներն, այժմ ապրում է ժողովրդական բնակարանի նոր ճարտարապետական ձևավորման որոնման շրջան: Հին ձևերն արդեն չեն կարողանում բավարարել նոր թե՛ կուլտուրական և թե՛ մանավանդ տնտեսական պահանջներին, առավելապես կոլեկտիվ տնտեսության հաղթանակից հետո: Վերջին երկրաշարժից հետո անմիջապես դրվեց ավերման ենթարկված գյուղերի վերապլանավորման խնդիրը, դրա հետ միաժամանակ դրվեց նոր կյանքին հարմարեցրած ժողովրդական տան խնդիրը: Այդ ուղղությամբ մի քանի փորձեր են կատարվում: Շտապ կառուցվեցին ճարտարապետների առաջարկած հատակագծերով շենքեր Խնձորեսկում, Շինուհայրում (Շենհերում), Սիսիանում (Սիսավանում), Ողջիում (Օխչիում), Գորիսում և հայկական ու ադրբեջանական մի շարք գյու-

²² Տե՛ս իմ հոդվածը՝ Мегринское крестьянское жилище, „Известия“ КИАИ, т. V, Тифлис, 1927.